



▲Gyoeng lwghag lauxsae baijok viengh cih “72 Cungguek”.

Denhngo:

Sim Lwgnyez Coh Dangj Angqcoux Cietgozging

天峨：童心向党 喜迎国庆

Bineix dwg Cungghoz Gung-canjdang laebbaenz 100 hopbi, hix dwg Cunghvaz Yinminz Gunghozgoz laebbaenz 72 hopbi. Vih hawj lwghag daj iq hagsib gij cingsaenz gyaezguk cuji, sonyinx sausenhuiyenz daj iq hagsib baenzlawz guh vunz, laebmaenh lijsienj gya, mboengqneix, Denhngo Yen Nazciz Cunghsinhau guh “sim lwgnyez coh dangj, giengz guk miz gou, hoh guk raeuz doekseng 72 hopbi” angqcoux Gozging. Yienh-cienz miz lai cungj hozdung: Swng

gozgeiz ciengq gozgo、baij yienghdoz caeuq gozgeiz hab’ ingj、doeg《Hohfuk Guekoj, Gyo’mbaij Guekoj》、baijok banjbaug lwghag veh de.

Gyoengq lwghag cungj naeuz aeu giendingh lijsienj saenqniemh, roengzrengz hagsib, aeu saedguh cwnghingz “sim lwgnyez coh dangj, giengz guk miz gou”, guh boux lwghag nyienh dawzrap seizdaih moq!

(Yaz Fungmeiz Yungz Liswh / 牙凤梅 熊利思)

Lwghag Sanglinz Aeu Vah-cuengh Doxdax Dungxcaiz

上林学子用壮语比拼才艺

Mboengqneix, Sanglinz Yen haiguh aen doxdax siujhagseng aeu Vahcuengh biucinj langhbaiz dungxcaiz, baijok gij makbaenz Cuengh Gun son’gyauq hagdangz yen de, coicaenh gij hongsaeh Cuengh Gun sonhag hwngfat mwnhoengh.

Ngoenz de, daengx yen miz ngeihcib caet aen Cuengh Gun siujyoz camgya doxdax. Doengh aen cezmu lumjbaenz fwen Bouxcuengh、heiq gobwnj、siujbinj daengj dawz gij daegsaek minzsug Bouxcuengh dieg de caeuq gij gyauyuz hagdangz doxyungz hwnjdaeu. Doeklaeng caiq bingzok haj aen it daengj ciengj, ngeih daengj ciengj caeuq

sam daengj ciengj gak cib’ it aen. Ndawde, 《Hwnqguh Lajmbanj Moq, Eu Fwen Soengq Hawj Dangj》hot fwen Hangyenz Cin Sanhsuij Siujyoz caeuq 《Aen Loqsiengj Cungguk Gou》 aen siujbinj Dangzhungz Yangh Lungzsiengz Siujyoz ndaej dai-byauj Sanglinz bae camgya aen doxdax daengx gih. Fwen de eu ok vunz lai ndaej duetgungz le gig gyo’mbaij、danqhaenh aendangj; siujbinj de cix aeu gij vah bouxlaux bouxlan sam daih gegangj gij eiqsik engq laeg aen loqsiengj Cungguk, hingzik biujyienj cix moq cix daegbied, gig mizyinx.

(Lanz Vujgenh / 蓝武坚)



▲Lwghag cingq biujyienj cezmu.

Gojgaeq Iq Gvendaengz Minzczu Doxgiet Baenaj Gvangjsih

广西民族团结进步小故事

Vahbouxbien: Aen biengz Gvangjsih raeuz gvangqlangh fouqmiz, ngoenzngoenz cungj miz haujai gojgaeq gvendaengz minzczu doxgiet baenaj cien okdaeu, comzgyonj baenz rengzmbwk caez cauh ranzmbanj、ndwenngoenz gyaunde. Daj geiz neix doxbae, bauq dou guh aen lanzmoeg “gojgaeq iq gvendaengz minzczu doxgiet baenaj Gvangjsih”, aeu doengh aen goj iq gikcoi、raeujrub、gamjdoengh vunz haenx langhbaiz gak minzczu gih raeuz doxyau doxrox、doxhuz doxnde, cukmaenh gij eiqsik caezcaemh Cunghvaz Minzczu, hawj gak minzczu lumj ngeihsigloux nei gotndaet guhdoi.

Ranz De Cib Vunz Haj Cuz Huzndei

一家十口 情融五族

Ranz Hou Cinyungz youq Lungzswng Gak Cuz Swciyen Swsuij Yangh Bazdanh Cunh Mbanlijbaiz, ranz de 10 vunz dwg sei daih caemh ranz, miz Myauzczu、Yauzczu、Dungcu、Bouxcuengh、Bouxgun haj aen minzczu, cungj bau Lungzswng haj aen minzczu cawj-daeuz liux, dwg aen ranz gak minzczu doxaeu gig dienjhingz

nde.

Gij goj ranz Hou Cinyungz yaek daj hajcib lai bi gaxgonq hainduj gangj. Seiz de, Hou Cinyungz daeg lwgmbauq Mbanj-cuengh neix dangbing ma ranz, vunz gaisau dah Yauzczu Majdiz Yangh ndeu hawj de guh yah. Doeklaeng songde seng le Hou Yizmung、Hou Yizlenz song dahlwg. Song dah neix

majhung, Hou Yizlenz haq ok rog bae, Hou Yizmung cix aeu Vanz Cwnzgen vunz Dungcu hwnjranz. Gvanbaz neix youh seng le Hou Gvanghyenz、Hou Gvanghcu, song daeg neix gak riengz daxgoeng caeuq daxboh dwngghi guh Bouxcuengh caeuq Dungcu. Hou Gvanghcu miz song daeg lwg, Hou Gvanghyenz baenz ranz le caiq aeu

ndaej daeg ndeu. Sam daeg neix gak dwngghi guh Yauzczu、Dungcu caeuq Bouxcuengh.

Aen ranz huzndei hung neix yienh’ok gij leixniemh minzczu doxgiet gaenq roengzrag diuz meg vunz lai bae lo.

(Aen Lanzmoeg neix youz Gvangjsih Minzczu Yenzgiu Cunghsinh gung gauj)